



KOPI PAHIT

Hampir-hampir tiga million ringgit telah digunakan kerana menyambut jubli intan Sultan Johor. Sultan sendiri dalam ucapannya tidak berkenan kerana keadaan masih “celaka” lagi. Orang –orang masih banyak yang mati dibunuh di dalam negeri Johor. Sungguh “celaka” wang sebanyak itu digunakan kerana negeri masih tidak aman dan kemakmuran masih belum diperoleh; Alangkah baiknya jika wang itu digunakan kepada yang lain untuk memakmurkan rakyat!

*

Pada pagi 17 September ramai orang duduk mendengar radio, di antaranya ada yang terawal apabila Ketua Menteri Persekutuan dalam ucapan tahniah kepada jubli intan sultan itu berkata “Jubli Intan Berlian” beberapa kali. Apabila ditanya pendapatku, aku hanya berkata: “Apalah supaya lebih sempurna lagi”? Semuanya tersenyum-harus juga jika ada bersama-sama Hang Sabat akan tersenyum bersama.

*

Kerana sultan berkata bagaimana orang mau merdeka kerana kapal perang belum ada dan seterusnya maka empat jam sesudah titah itu dikeluarkan Tengku Abdul Rahman Ketua Menteri Perikatan menyatakan supaya mengadakan “pemboikotan” kepada Istiadat Jubli Intan Sultan Johor itu isytihar itu kemudiannya diiringi dengan suatu kenyataan bahawa di dalam majlis mesyuarat negeri Johor yang akan datang pihak Perikatan akan membawa suatu cadangan supaya tiap-tiap ucapan sultan yang hendak diucapkan di hadapan umum itu mestilah dahulu diketahui oleh pihak kerajaan. Istana Johor, menurut orang-orang yang hadir, masih ramai dikunjungi sekalipun ada pemboikotan dan orang-orang UMNO yang banyaknya pegawai-pegawai negeri masing-masing terus mengadakan sambutan. Di sini nanti, menurut fikiran setengah-setengah pihak, jika Tengku

tidak berhati-hati harus kelak perkara ini menjadi perpecahan di dalam pengikut UMNO Johor khasnya kerana sekalipun harus ada kesilapan sultan namun orang-orang Johor itu terkenal kasih kepada rajanya. Hendaknya, halus-haluslah dalam perkara ini supaya jangan menimbulkan sesuatu yang merugikan.

*

Adakah British Aidabays dan Menteri Besar Johor boleh disalahkan atas ucapan sultan itu? Orang-orang yang mengetahui perhubungan mereka itu dengan sultan sudah tentulah tidak dapat menyalahkan mereka sebab sultan Johor yang telah 60 tahun memerintah itu adalah lain yang lain-lain.

*

Apakah yang harus menjadi kesan daripada pemboikotan dan jika benar, cadangan hendak memeriksa ucapan sultan yang dicadangkan oleh Perikatan itu kepada sultan dan raja-raja Melayu yang lainnya? Inilah satu tandanya kepada mereka itu kerana sungguhpun Perikatan memberi akuan akan mengawal taraf raja-raja itu dalam negerinya namun riak-riak itu harus kelak menerbitkan suatu syak apabila wakil-wakil rakyat memerintah penuh adakah raja-raja akan kekal memerintah ataupun mereka dengan keadaan seperti sekarang, tidak lagi sebagai pemerintah kerana kuasa-kuasa akan dipegang oleh wakil-wakil rakyat? Kejadian itu, sama ada dicuba hendak ditutup, haruslah menjadi perhatian di antara raja dan wakil-wakil rakyat.

*

Council agung Indonesia di Singapura telah ditegur kerana mengadakan minuman keras dalam perayaan rasmi menyambut hari Kemerdekaan Indonesia di sini baharu-baharu ini seperti juga telah pernah ditegur oleh majalah ini. *Council* Agung dalam jawapannya menyatakan bahawa yang demikian selalu juga diadakan di negeri-negeri Islam yang lain seperti Mesir, dan sekalipun ini tidak rasmi tetapi ia adalah sebagai satu adat kebiasaan ju. Sungguh menakjubkan jika pengawasan seorang Islam mengadakan minuman keras di dalam perayaan rasmi kerana yang demikian seolah-olah menunjukkan tentang kepada agamanya sendiri, seperti juga di Johor sultannya disebut penaung Islam tetapi dalam istiadatnya disertakan minuman keras sedang muftinya tidak menasihati dan memberi fatwa kepadanya dalam perkara itu. Sungguh ganjal.

Pada 28 Oktober hadapan genaplah dua tahun Majalah Qalam dan Warta dibakar oleh Tengku Abdul Rahman dan pengikut-pengikutnya dengan anjuran daripada....adakah pengarang Majalah Qalam akan mengadakan istiadat sambutannya dalam perkara ini?Inilah penyataan dari:

- Cemeti al-Farouk